

## Telegram di consumadus novëmber/dezember 2019

### Newsletter

Wenn Sie im KonsumentInnenschutz auf dem Laufenden sein wollen, abonnieren Sie kostenlos das Verbrauchertelegramm als Newsletter.

### Sentarí por mituns sot a 4 agn cun sistem d'alarm

#### Che adora pa n te sentarel?

Che che se tol para n möt o na möta sot a 4 agn te n auto imatricolé tla Talia o te n auto imatricolé te n stat foradecá mo rovenü da na porsona residënta tla Talia mëss avëi n te sistem d'alarm pro le sentarel.

#### Ci recuisic mëss pa avëi n te despositif?

I despositifs pó ester bele integrá tl sentarel o gní cumprá separat. An ne mëss nia i lascé omologhé, mo ai mëss avëi na detlaraziun de conformité dl produtur (autodetlaraziun); ciarede te vigni caje do, denanco cumpré le despositif sce al é bëgn na te detlaraziun lapró, dantadöt sce i le cumpréis sön internet o fora dl'Uniun Europeica. Chisc despositifs mëss s'ativé automaticamënter y l'ativaziun mëss gní confermada da n segnal. Sce al vëgn abandoné n möt te n auto mëssi dé n segnal acustich y otich, o acustich y aptich da odëi o aldí sides daite che defora dal auto. Al é ince possibl da se colié tres le fonin.

De novëmber â n valgûgn esperc ciamó de gragn dübi por ci che reverda i aparac da ciafé por le momënt y so funzionamënt tl respet dla lege - independëntemënter dal fat che tröpes botëghes â bele venü fora döt. Co y sciöche chësc sará tla pratica n'él por le momënt degûgn che sá. Al n'é gnanca da s'aspeté che chësta cossa vëgnes tosc stlarida definitivamënter.

#### Da can vëgnel pa straufé?

Le Ministere dl intern á fat sté sö les straufunghes de messé dl 2019, canche al ess messü jí en forza l'oblianza de chisc despositifs, deache al n'ê nia les normes d'aplicaziun tecniche. Chëstes é jüdes en forza ai 7 de novëmber dl 2019 y le Ministere dl intern á indô revoché la sospenziun dles straufunghes. Da chësta data inant podessel porchël gní fat straufunghes; le Ministere di trasporc scrí indere che an é

tl laur da lauré a na renviada aladô de chéra che al pé che an pois gní straufá impormó dal 1. de merz dl 2020 inant.

### Tan altes é pa les straufunghes?

Da 83 a 333 euro (sce an paia te 5 dis vögn la straufunga arbassada a 58-100 euro) y al vögn trat jö 5 punc dala patent. Sce an violëia la lege dui iadi te n ann vögnel tut la patent por 15 dis cina 2 mëisc.

### Chëstes informaziuns é gnüdes metüdes jö ai 18 de novëmber dl 2019; por informaziuns plü atuales ciarede sön la plata web dl Ministere di trasporc:

<http://www.mit.gov.it/comunicazione/news/seggolini-dispositivo-antiabbandono/faq>.

### Mascins de chirida: i consëis dla Zentrala di consumadus

#### Insciö adorëise dërt i portai de comparaziun

- En linia de prinzip: **ciarede da ester critics.** Al é da tigní a mënt che mascins de chirida ne Ves dá datrai degöna gran vijun generala dl marcé. Aladô dl setur ne tégneres nia dagnora cunt de dük i pitadus. N ejëmpl positif é i portai de comparaziun acredítá p.ej. tres l'autorité de control por la telecomunicaziun (Ag Com).
- Anuzesse de de **plü portai de comparaziun** por s'informé sön pitaus y prisc, denanco chirí fora n'oferta. Al pó zënzater ester desfarënzies danter i portai de comparaziun desvalis. Tla classifica pói ince té en conscidraziu tarifes desvalies de n pitadú.
- Confrontede les **ofertes, i prisc y les condiziuns de contrat sön la plata dl pitadú instës.** Datrai podessel gní miú marcé da stlüje jö n contrat diretamënter cun le pitadú co tres le portal de comparaziun - o ince al contrar. Implü podessel ester che al veles ince d'atres condiziuns de contrat. Ciarede ince ci che **che é scrit pice.** Por ejëmpl sce i orëis savëi, denanco stlüje jö le contrat, ci **poscibilités de retrata o reclamaziun** che al é y les condiziuns che regolëia le paiamënt de bonus. Ciarede ince do sce y sot a ci condiziuns che le portal de comparaziun pîta instës prestaziuns sciöche p.ej. n bonus.
- Metede averda ales **preimpostaziuns di portai de comparaziun.** Chëstes podess condüje a na classifica nia dagnora de vantaje por les consumadësses y i consumadus y limité por nia i resultac de chirida.
- Ciarede por ejëmpl che al ne vögnies nia ma mostré sö tarifes a chères che l'anuzadú ti röia direktamënter pormez tres le portal de comparaziun.
- Controlede l'impostaziun che reverda **l'incluijun de bonus tl prisc.** Ma insciö vára da confronté i cosc anuai efetifs dl sorvisc. Sce i chiris fora n'oferta deache tl pröm ann de contrat éra miú marcé porvia de n bonus, podess chësc Ves gní a costé cotan deplü tl secundo ann de contrat.
- Recordesse implü che l'aziënda mëss ince efetivamënter Ves païé fora le bonus. Tl passé á aziëndes impormetü bonus che ares n'á spo nia païé fora. La clientela á messü ti salté do a sü scioldi. I podëis ma s'adressé ai portai de comparaziun por le paiamënt de bonus, sce ai le garantësc te na manria espressiva. Confrontede i resultac de chirida sön les ofertes cun bonus ince cun i resultac de chirida sön les ofertes zënza bonus. Insciö vára plü saurí da confronté les ofertes.

- Tignide indalater i resultac de comparaziun de mascins de chirida dales **anunzies païades**. Controlede dagnora sce i resultac de chirida á injunes - porleplü che ne dá nia tl edl - sciöche "Gesponsert", "Sponsorizzato" o "Anzeige", "annuncio".

## **Sozietés de incas mëna avertimënc sön bolëtes dla forza eletrica che vá derevers de de plü agn ZCS: sce i imporc é tomá en prescriziun él da fá avarëi dük i dërc!**

Ultimamënter él cotan de consumadësses y consumadus dl Südtirol che ciafa da païé da pert de sozietés d'incas desvalies ordins de paiamënt de bolëtes dla forza eletrica vedles, sciöche al pé mai gnüdes païades, dantadöt dal "Servizio Elettrico Nazionale" (l'ex-Enel). Mo te tröc caji se tratera de imporc bele tomá en prescriziun, por chi che an pó fá avarëi le dërt relatif.

An baia de na "prescriziun de na bolëta" sce ara reverda le consum di agn da denant. Sce al é passé n certo tëmp (agn) y le fornidú ne s'á mai mené te chësc tëmp na comunicaziun o n avertimënt de paiamënt de chëstes bolëtes, ne pó le fornidú nia plü pretëne che ares vëgnes païades. Sce le titolar de n credit ne eserzitëia nia so dërt te n tëmp scrit dant dala lege vëgnel destodé propi tres la prescriziun. Bolëtes dla forza eletrica toma en prescriziun te 5 o ince 2 agn. Sce al é gnü constaté na prescriziun (anfat sce ara é de 5 o 2 agn) - por ejëmpl ince damanan do na copia dla bolëta, che le consumadú á dagnora le dërt da ciafé, por ciaré do – él da la contesté por scrit.

**Important:** chësta contestaziun mëss gní fata dan dal paiamënt; sce l'import damané vëgn païé ne pónia plü gní damané derevers. Sön [www.verbraucherzentrale.it](http://www.verbraucherzentrale.it) él da ciafé dük i detais por constaté la prescriziun, sciöche ince na lëtra model por la reclamaziun dl ordin de paiamënt.

### **Ci é pa listeries y co pón pa se defëne?**

Listeries é baters a forma de bachëc. Ares é da ciafé sura döt le monn y vëgn dant feter indlunch tl ambiënt, tl terac, sön plantes y tl'ega. Por les porsones é dantadöt importanta la listeria monocytogenes deache chësc bater pó gaujé na listeriosa.

Listeries pó rové sön ordöra frësca o salates da fëia tres tera che contëgn le bater o coltöres che vëgn da tiers. Le bater vëgn dantadöt trasmetü a alimënc crüs che vëgn dai tiers. Implü él da dí che les listeries soporta bun le se y l'ambiënt aje y tëgn fora cinamai temperatöres basses y la mancianza de ossigen. Ares é bones da s'ingeneré ince a temperatöres che é te frescara.

Ares vëgn prigrosoes por la porsona canche le numer de baters arjunj, tres l'ingeneraziun, passa 100 germs pro gram o mililiter. Tl caje de porsones sanes se manifestëia n'infeziun da listeries generalmënt te na forma lisiera cun sintoms sciöche chi dla coia al magun. Por porsones cun n sistem imunitar debł pórta indere gní prigrosoa. Ince porsones püres y atempades, popi y de dici mituns sciöche ince ères che aspeta é a risch. Le tëmp da canche an s'á taché la maratia y canche ara rump fora é en general de trëi edemes, mo al pó ince ester cotan plü dí.

"Na bona igiena te ciasadafüch sides tles ciases privates che ince tles strotöres d'assistëenza pó presservé dala trasmisiun di germs y insciö da na infeziun" dij Silke Raffeiner, esperta de alimentaziun dla Zentrala di consumadus dl Südtirol. "Temperatöres de passa 70° copa jö les listeries." Porchël dess alimënc che vëgn mangiá crüs dagnora gní lavá indortöra y laurá sö te na manira näta, la cern y le lat

crü y patüc de chësta sort dess tres gní scialdá assá o cöc indortöra. Ales porsones che á n sistem imunitar debi, ales porsones atempades, amarades, ai picu mituns y ales éres che aspeta ti vëgnel aconsié da renunzié a lat y ciajó crüs, cern crüa, roba da cern taiada sö, pësc crü y pësc sfomié.

### **Liber dl telefon? No, giulan!**

### **Co fá da ne ciafé nia plü le liber dl telefon y ne messëi insciö nia paié sü cosc sön la bolëta dl telefon**

Cotan de consumadësses y consumadus damana do tla Zentrala di consumadus dl Südtirol (ZCS) sce al é bëgn dërt che la TIM/Telecom ti arates vigni ann 3,90 euro por le liber dl telefon. Deache: tröc ne n'a degun interes da ciafé le liber dl telefon y n valgûgn ne s'intënn gnanca che al ti vëgn metü en cunt chësc import.

Al é bëgn tler che cun i sorvise d'informaziun da ciafé sön internet ne adoron nia plü dër n liber dl telefon; mo TIM mëna impó fora te dötes les ciases dles porsones abonades n exemplar y arata sambëgn sü cosc. La consegnaziun dl liber dl telefon vëgn preodüda tl contrat, mo plüdadî n'ê i cosc indinenia tan alc (a pert chësc gnô le liber dl telefon veramënter adoré dër gonot). Y sëgn é le liber dl telefon, che é cotan plü cer, ma plü te n ciantun a té sö stöp, sce an se l'á tut para te ciasa.

### **Co pón pa schivé che al vëgnes metü en cunt chisc cosc?**

Sön la plata web dla TIM él döes possibilités por desdí le liber dl telefon. An pó le fá cherdan sö le 187, le numer dl sorvise cliënc, o menan n fax al numer vërt 800.000.187. La ZCS aconsiëia da s'anuzé dla secunda possibilté, deache na telefonada ne vára nia da documenté tan saurí, pro n fax indere ciafon na confermaziun cun na data.

Che che n'o nia plü ciafé le liber dl telefon y ó dantadöt se sparagné i cosc de feter 4 euro al ann dess ti mené ala TIM por fax la lëtra model metüda a desposiziun dala ZCS.

La lëtra model é da ciafé sot a [www.verbraucherzentrale.it](http://www.verbraucherzentrale.it) sciöche ince pro dötes nostes portines.

### **5G: compagnies telefoniches a ciacia de terasses sön têt**

Les compagnies telefoniches á atualmënter n gran interes da té adinfit terasses sön têt por istalé lassura antënes. Sovënz s'adresséieres diretamënter ai administradus de condomine y ti impormët de majeres somes por la locaziun de chëstes terasses, che é de propriété coletiva. Sce an tëgn ma cunt dles entrades possibles por le condomine, riscëion indere da lascé da na pert aspec importanc de chësta dezijiun.

DI 2018 á le Tribunal administratif dl Lazio condané trëi Ministeri che ne se crüzia bele da agn incá nia da dé informaziuns sön i prighi por la sanité liá ala telefonia mobila. Sce an sá val' de te pél zénzater prigorus da ti afitë le têt de ciasa a compagnies che laora cun chëstes technologies. Al é ince da se damané sce i imporc che vëgn pitá - scerbëgn che ai pé alc - é bëgn adatá. Sce tl dagní essel da gní constaté responsabilités ziviles y penales por l'istalaziun de chëstes antënes, la paia mefo les proprietaires y i proprietars y les administradësses y i administradus de condomine: degöna sozieté d'assiguraziun ne stlüj jö de te polizes d'assiguraziun. Implü él da dí che pro la prozedöra de lizita dles

lizënzes por i 5G n'él nia gnü damané do i arac sanitars obligatori preodus dala lege; ciamó n majer risch deache an ne pó gnanca s'anuzé dles garanzies dl Stat. Daverta romagn ince la chestiun sce al vägn desmendrí le valur de n frabicas che á na te antëna sön têt.

La iurisprudënsa ne dá nia na resposta tlera ala domanda, ci maioranza che al ó ester te n condomine por aprové la locaziun de n têt por istalé n'antëna. Nüsc iuriscá á la tendënsa da dí che la condiziun por podëi tó na te dezijiun é che ara vägnes tuta al'unanimité de dötes les comproprietares y duc i comproprietars, deache deliberes fates cun d'atres maioranzes podess gní contestades saurí (p.ej. da che che stá tles alzades söinsom che é plü dlungia l'antëna).

Implü n'él nia ciamó tler sce le condomine perd so status de soget de cuta passif porvia de chëstes majeres entrades y sce chëstes entrades mëss gní detlarades y sce al mëss gní paié les cutes lassura o no.

Inultima él ti contrac d'afit che nes é gnüs presentá cina ciamó döta na ligna de clausoles nia tleres che porta desvantaji por le condomine che lascia ia terasses sön têt adinfit.

Informazion y consulënza sön chësc argomënt ciafëise tla ZCS.